



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8



Ato kilonser Modi aser Cyprus Tir Christodoulides na senden amen



Season tembangba sülen Guardiola-i Man City toktsütsü

VOL. XXIII ISSUE NO. 219 (ADOK 219) DIMAPUR KÜPTOKNÜ (SATURDAY) MONUPII (MAY) 23, 2026 ₹ 5.00

Nagaland sorkar mapa inyaker tem dang PIMS atema nenshir

Dimapur, May 22, 2026 (TYO): Nagaland sorkari kuli tejangja magütsü aliba sorkar mapa inyaker tem Personal Information Management System (PIMS) kübok verification aser authentication asütsü tetuyuba agütsüogo.

May 22, 2026 nü Personnel & Administrative Reforms Department-i Personal Information Management System (PIMS) Cell ajanga iba osang ya authentication mesüi aliba sorkar mapa inyaker tem dang metetdaksüogo.

State sorkari tesüiba nung departments aser employees dang Aadhaar den PIMS sendaktepsü atema tetuyubatem agütsüogo. Sorkari June 14, 2018, August 2, 2018, October 29, 2018 aser July 28, 2021

anogotem sangdong balala agütsüogo ajisüaka sorkar mapa inyaker aikati Aadhaar sendaktepba mapa meinyaki lir ta PIMS Cell-i ashi.

Sorkar mapa inyaker kar ket nung Aadhaar melira mesüra Aadhaar agütsütsü memulungra Aadhaar Authentication for Good Governance (Social Welfare, Innovation, Knowledge) Rules, 2020 nung lateta aliba ama tsünglanglen agüja aliba nungi kulikaket anabosa agütsütsüla.

- PAN Card
- Driving Licence
- Indian Passport
- Bank Passbook of the salary account
- HSLC or equivalent Class X Admit Card displaying photograph, father's name and date of birth

NESO-i Manipur nung nisung tepsetba aitsür

Dimapur, May 22, 2026 (TYO): Manipur nung ozüing alema inyaksangshi manenba khukhua aitsür ta North East Students' Organisation (NESO)-i sangdong ka nung metetdaksüogo.

Guwahati nung All Assam Students' Union (AASU) lenisüba kübok NESO senden ka amendang Manipur nung Kuki aser Naga nung tsüngda mepetmesü indang benoka lemsatep.

Senden nung olemtepba sülen NESO-i bangzüing aika renemogo aser item rongnung arogo lennirtem dena tai maketba civilian amakba aitsüogo.

Yimjung mapa inyaker civilian tem dak teka sangshiba asoshi temeten kecha mali ta NESO-i metetdaksüogo.

Parnokisa pua alir ajak tatemzüka kecha melii chioktsü aser parnok lendongi meidaksütsü atema takhangba agütsüogo.

India sorkari Manipur nung tensa mejungi aliba süngjemdaksütsü asoshi mapa meinyakteter. Manipur nung mepetmesü adokba sülen nisung aika samar mangur anungji parnok bushi arutettsüsa mapa tenzüksü akhanger ta NESO-isa metetdaksüogo.

NESO-i kintem aser sendaktepa alir ajak dang tayang meküpzüktepsü aser ozüing alema meinyaksü mepishiogo. Manipur nung yimjung, temeten aser tensa süngjemtsü asoshi ajaki yaritepsü ayongzüker ta parnokisa ashi.

AKM, DCPU aser Child Helpline 1098 mensem amen

Mokokchung, May 22, 2026 (TYO): May 22 nü Ao Kaketshir Mungdang (AKM), District Child Protection Unit (DCPU) aser Child Helpline 1098 pur telungjem senden ka Department of Social Welfare, DCPU Office, Mokokchung nung menogo.

Iba senden nung district nung tanurtem dak sendakba tebilemstü atema tesentaktep tashi itshitsü asoshi jembi. Tongtibang onüktem rongnung-school tem nung tashiyim aser tanur tim mesüi benshiba ken o, tesayur-kaketshir mangatetep, kakat rejutem nung tim masüba mapa inyakba aser hostel nung kaketshirtem timtem ajuruba densema liasü.

AKM aser DCPU ketdangsürtemi kaketshir teloktem, school-tem, tsüraburtem aser tanur

kümzüksü tentetba telok balala den külemi yaritepsü nungdakba indang lemsatep.

Senden nung Child Helpline 1098 ketdangsürtemia parnoki ajangshiba aser inyaka aruba indang osang lemsatepa liasü.

Iba sentong nung shilem agirtemi aroki meteta alitsü sentongtem, mapang shitak nung ken o benoktsü aser hostel & school-tem kanga junga mita repringtsü atema yaritepa aotsü telemtetba agi.

AKM-i Mokokchung nung tanurtem kümzüka ayutsü atema department den amalitepa inyaksü nangzüker.

Iba senden nungsa Mokokchung district nung tanurtem kümzüka ayutsü atema maneni shisalemsatepsü aser tesentaktep tashitaitba akümtsü telemtetba agiogo.

Governor Yadav-i NU indang National Seminar nung aden

Dimapur, May 22, 2026 (TYO): Nagaland Governor aser Nagaland University Chief Rector Nand Kishore Yadav-i Meriema Campus, Kohima nung National Seminar nung denogo.

May 22, 2026 nü School of Humanities and Education, Meriema Campus, Kohima, Nagaland University ajanga "Revisiting Tribal Heritage of Northeast India: Challenges and Opportunities" ta ser National Seminar ayonga agi.

"Nagaland University-i iba shisatokden ayongba atema tenüngsang agütsür aser iba ya Northeast India sobaliba matsü aser lokti tesentaktep den kanga putepa lir" ta Governor Yadav-i ashi.

"Northeast nung kin, oshi, inyaksangshi, sobaliba aser lisopur shisatsü temeyoktep aser khenyongi balaka lir aser iba

sobaliba senmang takar ya India asoshi senti lir" ta pai ashi.

Alima kanga kara ainba aser technology renloka aoba ajanga sobaliba rejutem aser sobaliba inyaksangshi asoshi tayongzükerba tulu bentsür arua lir ta Governor Yadav-isa metetdaksü.

Lisopur oshitem aser tebang otsü sama aoba aser lanuputui sobaliba tera nungi pilaba atema tebilemstü abener. Iba asoshi academic discussions aser seminars amala ayonga agiba ajanga lisopur senmang ajungketer aser wazüka ayur ta paisa shisem.

Senmang wazüka ayuba ya terenlok anema ta mebilemstüla saka terenlokji sobaliba den puteptsü, ajak adentsü aser mesamatsü asoshi merangba ka ama züngshitsü. Anungji academic institutions, researchers, policy makers aser

civil society organizations külemi yaritepa sobaliba senmang ajungkettsüla aser wazüka ayutsüla ta Governor Yadav-isa ayongzüker.

"Nagaland University ajanga temelenshi bener arutsü shilem agitettsü aser nenoki interdisciplinary studies ajungmesotsüla, indigenous knowledge systems tashi itdaksütsüla, lisopur oshitem ajungkettsüla aser sobaliba shisatsü den tanü shisaliok sendaktepsüla" ta paisa ashi.

Linük kübok tesem balala nungi scholars aser experts-i iba sentong nung shilem agiba atema tenüngsang agütsü. Iba ajanga Northeast India nung sobaliba senmang aser terenlok dak sendakba tongti onüktem angatettsü aser item asoshi shisatsü lemsatepsü ta Governor Yadav-isa metetdaksü.

AH & Veterinary Services-i ASF azüoktsü meranger

Dimapur, May 22, 2026 (TYO): Directorate of Animal Husbandry & Veterinary Services, Nagaland-i state kübok tesem balala nung African Swine Fever (ASF) prokshiba atema tenük yoka repringdar aser maparen balala inyaker.

Department-i District Veterinary Officers aser field staff ajanga wara azüoktsü asoshi surveillance, containment, awareness, sample collection, aser biosecurity measures inyaka arudar.

African Swine Fever ya

menatepba tashidak ka lir aser iba tashidak agi ak dak kongshir, ajisüaka iba tashidak agi meimchir dakbo mekongshir aser public health concern ka masü.

Ajisüaka iba wara ajanga ak metsürtemi takoksa jenti ajurur anungji mapang shitak nung osang sangoktsütsüla aser tenokdangbatem agütsütsü nungdaker ta Department-i ashi.

Nübertemi ak shirangba mesüra ajungbena asüba osang anasatiba Veterinary Institution/Office nem sangoktsütsüla aser wara aliba tesem nungi ak, akshi

aser pork products mebelentsüla ta department-isa metetdaksüogo.

Ak metsürtemi farm hygiene aser biosecurity practices shitak inyaksüla aser ak tasütem ayong, arem mesüra tema nung mashii meindoktsüla ta parnokisa ashi.

District Administration-i anir Chief Veterinary Officers, Veterinary doctors, Veterinary Field Assistants, aser Mobile Veterinary Units ajanga wara azüoktsü asoshi mapa inyakba atema pelar aser tenüngsang agütsür ta Directorate-isa metetdaksüogo.

Manipal Hospital-i Dimapur media nisungtem den ajurutep



Dimapur, May 22, 2026 (TYO): Manipal Hospital EM Bypass-i Hokolbar nikongdang Dimapur nung media nisungtem asoshi 'Anveshana - Medical Education for Media' ta ser sentong ka ayonga agiogo.

Iba sentong nung Manipal Hospital EM Bypass, Kolkata nungi Dr. Harsh Jain, Senior Consultant - Neurosurgery, Dr. Arya Chaudhuri, Consultant - Cardiology, Dr. Subhankar Chakraborty, Consultant - Emergency aser Dr. Arunava Roy, HOD - Gynaecologic Oncology nung er aden aser CPR

training aser awareness session ka dena agiogo.

Iba sentong nung media nisungtem dang neurological emergencies, cardiovascular diseases, cancer care, aser life-saving CPR techniques indang lemsatep.

Manipal Hospitals ajanga Northeast India nung healthcare awareness tashi itshitsü aser shirangertem yaritsü meranger.

Iba sentong nungsa Media Privilege Card saya aser iba ya Manipal Hospitals' facilities nung journalists-i healthcare access aser exclusive benefits angutsü atema lir.

Manipal Hospital EM Bypass-i 'Anveshana - Medical Education for Media' ya Tamluk, Contai, Bardhaman, Jamshedpur, Aizawl, Malda, Dinajpur, Darjeeling, Arunachal Pradesh aser Agartala nung agiogo.

Manipal Hospitals India nung healthcare providers tajungtiba rongnung ka lir aser kümshia shiranger 8 million shi anepalur. Manipal Hospitals India indang mozü ki 49 tashi yimti 24 nung lir.

Manipal Hospitals indang licensed beds 12,600 lir aser doctors 11,000+ den mapa inyaker 34000 tema lir.

Kohima nung "Jan Bhagidari Abhiyan - Sabse Door, Sabse Pehle" tenzük



Dimapur, May 22, 2026 (TYO): May 22, 2026 nü Kohima District atema "Jan Bhagidari Abhiyan - Sabse Door, Sabse Pehle" IEC Campaign tenzükogo.

Iba sentong ya sorkar welfare schemes balala awareness aser outreach atema lir aser Deputy Commissioner's Conference Hall, Kohima nung agi.

Prime Minister-i Viksit Bharat atema mangdang ayuba ajanga ajungmesoa "Jan Bhagidari Abhiyan - Sabse Door, Sabse Pehle" IEC Campaign agir.

Iba Campaign ajanga lisopur kintem tashi agütsüsü, lisopur senmang tajungba kümdaktsüsü aser department mapa balala külemi inyaka aotsü nükjilding nung agir.

Iba campaign kübok Jan Sunwai, awareness generation programmes, village immersion, entitlement resolution aser community outreach initiatives inyaker.

Iba sentong ajanga sorkari ketdangsubaren nung ajak dendaktsüsü aser loktiliba nung shilem ajak dangi terenlok atongtsü merangba sayur. "Sabse Door, Sabse Pehle" omen ajanga sorkar ketdangsubaren aser public

service delivery ya meta talangtiba pilar alidak alirtem atongtsü nükjilding lir ta ta Kohima Deputy Commissioner B. Henok Buchem, NCS-i ashi.

Nagaland nung tekong-tenem aser nisung temeyoktep aliba ajanga sorkar ketdangsubaren aser service delivery nung maongka aser tayongzükba külemi ajurur. Iba campaign ajanga administration aser sensotem tesentaktep akangshitsü aser sorkar services nübor atongtsü atema lir ta Deputy Commissioner-isa ashi.

"Sensotemi tongti shilem agi nung dang terenlok angur. Iba campaign ya schemes inyakba indang dang masü saka temulung lemtep adoktsü, public khurettem angatsü aser loktiliba ajungtsü atema loktii shilem agitsü ajungmesotsü atema lir" ta Henok Buchem-isa ashi.

Sorkar department balalai awareness activities, outreach programmes, service delivery camps aser interactions agitsü aser beneficiary tem welfare schemes den sendakteptsü merangtsü ta paisa shisem.

District nung terenlok mapa inyakba nung village councils, arogotem, lanur teloktem, tetsür teloktem aser civil society organizations-i yaritepba atema


pelar. Külen, iba campaign nung ketdangsurtem, field functionaries, frontline workers aser volunteers nem tenüngsang agütsür ta Kohima DC-isa metetdaktsü.

Loktiliba nung meta talangtiba pilar alidak government services aser welfare schemes atongtsü atema "Jan Bhagidari Abhiyan - Sabse Door, Sabse Pehle" campaign tenzük. 2011 Census ajanga India nung lisopur nütsüng yongsük crore 10.5 tema lir ta ashir aser iba nung Mizoram, Nagaland aser Lakshadweep amala state tem nung lisopur teimtiba lir ta Divisional Forest Officer, Kohima, Dr. Sevono Seletsu-i ashi.

Sorkari Particularly Vulnerable Tribal Groups (PVTGs) dena lisopurtem asoshi scheme aser mapa aika tenzükba lir. Nagaland nunga PVTGs pungu ajiteta lir aser iba campaign ajanga schemes aser services balala nübortem dang metetdaktsüsü aser beneficiary shiai angutsü atema osang prokshitsü ta Dr. Seletsu-isa ashi.

Laisa department ajak amalitepa inyaktsü aser schemes o services kübok 100% coverage alizüing atongtsü atema meranga inyaktsü ayongzük.

Dimapur nung Special Intensive Revision (SIR) agitsü



Dimapur, May 22, 2026 (TYO): Election Commission of India (ECI)-i Nagaland dena State 16 aser Union Territory 3 nung Electoral Rolls indang Special Intensive Revision (SIR) agitsü osang metetdaktsüogo ta Dimapur

Deputy Commissioner & District Election Officer, Dr. Tinojongshi Chang, NCS-i ashi.

Nagaland nung Special Intensive Revision agitsü atema qualifying date ji January 1, 2026 ta latetogo.

Commission-i mapang telemsa agütsüba ama Nagaland nung August 5 nungi August 14, 2026 tashi Special

Intensive Revision atema preparatory activities aser training programmes agitsü. Iba sülen August 16 nungi September 14, 2026 tashi Booth Level Officers (BLOs)-i house-to-house verification asütsü ta Dimapur DC-i sangdong ka nung ashi.

September 14, 2026 tashi nung polling stations indang rationalization maparen atemtsü aser September 20, 2026 nü draft electoral roll sayatsü.

September 20 nungi October 20, 2026 tashi claims aser objections agütsüsü akok aser October 9 aser November 18, 2026 tashi item ken o tem

angadangtsü. Iba sülen November 23, 2026 nü final electoral roll sayatsü ta Dr. Tinojongshi-isa ashi.

Tang Census maparen nung house listing inyakba nung ajemdaker SIR Phase-II mapang latetogo aser iba maparen nung voters, political parties aser election ketdangsurtem ajaki shilem agitsü imlar.

Dimapur district kübok recognised political parties dang polling booth shia nung Booth Level Agents (BLAs) shimtsü mepishia metetdaktsüogo. Iba ya mapa inyakba nung tashishitsü malitsü aser revision maparen tiptema inyaktsü atema lir. Maneni political party tem dang Special Intensive Revision exercise nung shilem agitsü ayongzükogo ta Dimapur DC & DEO-isa metetdaktsü.

Talisa, Dimapur district nung aliba senso ajaki house-to-house verification process mapang BLOs den amalitepa yariteptsü mepishir ta paisa shisem.

Jalukie nung International Day for Biological Diversity 2026 amung

Dimapur, May 22, 2026 (TYO): May 22, 2026 nü St. Xavier College, Jalukie, Peren nung International Day for Biological Diversity 2026 mungogo.

Iba sentong ya "Acting Locally for Global Impact" omen nung ajemdaker among aser Principal Secretary, Department of Environment, Forest and Climate Change (DEFCC) & Nagaland State Biodiversity Board (NSBB) Chairman Y. Kikheto Sema, IAS-i tetushi süa jaoker ka ama shilem agi.

"1992 nungi Convention on Biological Diversity (CBD) agizükba bilemteta International Day for Biological Diversity ya kümshia amunger. Food security, water, health, climate resilience aser livelihoods atema biodiversity ta kanga tongtipang aser biodiversity conservation ya meimchir liyonga aotsü atema kanga nungdaka kümogo" ta Kikheto Sema-i ashi.

Lipoküm kümzükba ayutsüba ya nübortem nungi tenzük aser süngdong atemba, yimtsüng jenjang nung wazükba ayuba, lokti merükmeju inyakba, taküm libaliro melenshiba aser ali rongsen timi amshiba ajanga global biodiversity alizüingtem atongtsü ta pai ashi.

"Nagaland nung biodiversity kanga takar lir aser asenok ya Indo-Burma biodiversity hotspot nung adener. Nagaland nung arem-min tulu lir, arem shiruru jenti lir, ayongtem, mozü süngolio, orchids aser

tsünüsensong tapu jenti lir. Ajisüaka, süngdonglidong tsüngdokba, menenba, morok mi, ali anenzükba aoba, tzü peria manguba aser ali rongsen mashii agiteta agiba ajanga lendong bentsür arutsü" ta Kikheto-isa ashi.

Nagaland nung 2013 aser 2023 tsüngda arem-min 794.88 sq. km shi akoksa aser ano 2019 aser 2021 tsüngda 235 sq. km shi akoksaogo ta India State of Forest Report (ISFR) nung shia lir ta paisa metetdaktsü.

Lanurtem ya tarutsü alima ketdangsurtem lir anungji nenok "Ambassadors of Nature" akümtsü ayongzük. Anogoshia libaliro nung plastic waste mamshitsü, süngdong atemtsü aser kümzükba ayutsü, tzü wazükba ayutsü aser People's Biodiversity Registers (PBRs) ajanga local biological resources bendena wazükba ayutsü merangtsüla ta Kikheto Sema-isa ashi.

"Nagaland nung ali aser arem 95% tashi nübor meyong lir anungji nübortem, shisaliok rejutem, arogotem aser civil society organizations-i Forest Department aser Biodiversity Boards den yaritepa wazükba ayutsüla. Arrla 371A ajanga Nagaland nung alir nem ali aser ali rongsen madak kibur asütsü tashi agütsür anungji nübortemi state nung biodiversity samaa meyoktsüla aser tarutsü pututem asoshi kümzükba aser wazükba ayutsü ayongzük" ta paisa ashi.

Chümoukedima nung merükmeju mapa inyak



Dimapur, May 22, 2026 (TYO): May 22, 2026 nü monsoon preparedness maparen nung shilem ka ama Chümoukedima district ajungalen lokti nübodoka merükmeju mapa inyakogo.

Iba mapang kilentzü ayimdak merükba den tangbanga aliba lapok, jana aser kiojen yangluba amshiba osettem agien, jana endok, arem merüktem aser public spaces & utilities merükmeta liasü.

SDO (C) & RO, Chümoukedima, Thejavizo Nakhro-i anir National Highway-29 nung joint inspection liasü.

Maneni, Water Resources Department, PWD, PHED, Fire & Emergency Services, 1st NAP Battalion, Chümoukedima Town Youth Organization aser NHIDCL külem telok kati 3rd Mile Airport culvert nungi Chathe Bridge (Patkai Bridge) tashi NH lenmang nung merükmeju mapa inyaka liasü.

Iba sentong ya sorkar department tem, Chümoukedima Town Council, Village Councils, GBs, civil society organisations aser district nung aliba public külemi yaritepa takok ngua inyakogo.



**GOVERNMENT OF NAGALAND
INVESTMENT & DEVELOPMENT AUTHORITY OF NAGALAND (IDAN)
NAGALAND SKILL & ENTREPRENEURSHIP DEVELOPMENT MISSION (NSEDMD)**

NO. NSEDMD-PMU/ESTT-3/1/2025

Dated Kohima, the 23rd May, 2026.

ADVERTISEMENT

GOVT. SPONSORED SKILL DEVELOPMENT TRAINING OPPORTUNITIES

SI No.	Skilling Trade	Tentative Start Month	Duration	Eligibility	Location
1	Certified Graphic Designing	01 June 2026	1 Month	Class 10th Pass Basic Computer Knowledge	Kohima (Residential Option Available)
2	Full Stack Web Development	01 June 2026	2 Months	Class 12th Pass Basic Programming Concepts	
3	Full Stack App Development	03 August 2026	2 Months	Class 12th Pass Basic Programming Concepts	
4	Building Interactive Worlds with No-Code AR/VR	03 August 2026	1 Month	Class 12th Pass Basic Computer Knowledge	
5	Certificate Course in Audio & Video Editing	01 June 2026	1 Month	Class 12th Pass Basic Computer Knowledge	Kohima & Dimapur (Residential Option Available)
6	Social Media Management	01 June 2026	1 Month	Class 12th Pass Basic Computer Knowledge	Dimapur
7	Industrial Welder (Oil & Gas)	01 June 2026	3 Months (100% Placement)	Class 10th Pass 18-30 Years Old	Guwahati (Residential)
8	RORT Solar Installer (Oil & Gas)	01 June 2026	3 Months (100% Placement)	Class 10th Pass 18-30 Years Old	Guwahati (Residential)
9	Accountancy	June 2026	3 Months	Class 12 th Pass	Dimapur
10	GST	June 2026	3 Months	Class 12 th Pass	Dimapur
11	Data Analytics	June 2026	3 Months	Class 12 th Pass	Dimapur

* Residential indicates that the training programme includes free accommodation and meals for all candidates
* Kindly note that all skill trainings are exclusively for self-employment and placement opportunities and candidates will undergo a screening process prior to selection.
* For Sl. 1, 2, 3, 4, 5 & 6, a registration amount of Rs. 1000/-only (Refundable) will be charged which will be REFUNDED after successful completion of the training.

Eligibility : Only Indigenous inhabitants of Nagaland

Need Help? Contact us at : +91 6909465902 (9 am - 5 pm)

For more details, visit : nsemd.nagaland.gov.in

Follow us for updates: @nsemd_nagalandskillmission



SCAN TO APPLY

**Sd/- (VINEET KUMAR, IAS)
Addl. Secretary Finance
Project Manager, NSEDMD-IDAN**

Ato kilonser Modi aser Cyprus Tir Christodoulides na senden amen



New Delhi, Monupii/May 22 (Agencies): Hokolbarnü Ato kilonser Narendra Modi aser Cyprus Tir, Nikos Christodoulides na leniba nung tongti ketdangsertem senden mena lenla balala nung tesendaktep akangshitsü atema jembigo.

Iba senden nungji External affairs minister S Jaishankar, National Security Advisor Ajit Doval aser foreign secretary Vikram Misri nungera liasü.

Ministry of External Affairs (MEA)-i sangdong ka ajanga, lenir anati linük ana tsüingda shishilembaba, investment, technology, shisaliok, sobaliba, defence aser security sectors nung amalitepa inyakba tashi itshitsü atema jembigo, ta metetdaksü.

Kasa senden nungji artificial intelligence, fintech, innovation aser research atema-a jemi.

Lenir anati regional aser International onüktem nunga o lemtepogo.

Christodoulides-i Mumbai semdangba sülen Brihostibarnü New Delhi tonga arua liasü.

Yaküm June ita nung Ato kilonser Modi-ia Cyprus semdanga liasü.

Hokolbarnü iba senden jakdang External Affairs Minister, Jaishankar-ia

Christodoulides ajurua jurila senden ka mena liasü.

Cyprus Tir den foreign minister Constantinos Kombos aser transport minister Alexis Vafeades na densema tongti ketdangsertem aikati anogo pezünü India semdang.

June 18 nü Rajya Sabha menden 24 atema election agitsü

New Delhi, Monupii/May 22 (Agencies): Hokolbarnü Election Commission of India (ECI)-i, June 18 anogo nung state ter nung Rajya Sabha menden 24 atema election agitsü, ta sangdongogo.

June 21 nung July 19 tsüingda Rajya Sabha nung züingsem 24 kümsük abensatsü, aser parnok rongnung taoba mapang Ato kilonser H. D. Deve Gowda, Congress lenir Mallikarjun Kharge, Congress lenir Digvijaya Singh aser Union Minister ana- Ravneet Singh aser George Kurian nunger densema lir.

Andhra Pradesh, Gujarat aser Karnataka state tem shia nung Rajya Sabha menden pezüzü, Madhya Pradesh aser Rajasthan na nung menden asemsem, Jharkhand nung menden ana aser Manipur, Meghalaya, Arunachal Pradesh aser Mizoram state tem nung menden kaka atema election agitsü.

Kasa anogo nungjisa Maharashtra aser Tamil Nadu

na nunga menden kaka atema by election agitsü.

Iba election nung tokteptsü atema nomination papers file asütsü asoshi tatembangbuba anogoji June 8 asütsü.

Menden 26 nungjagi tang NDA züingsem 18 lir, Congress pezü, Jharkhand Mukti Morcha (JMM) ka aser YSR Congress Party (YSRCP) asem lir.

Rajya Sabha menden 26 nungjagi NDA-i menden 17 angutsüa akok; Congress-i menden pongu, JMM-i menden ana aser Tamil Nadu nung menden kaji Tamilaga Vettri Kazhagam (TVK)-i angutsüa akok ta asadangteter.

Tang Rajya Sabha nung BJP-i aniba NDA teloktep nungi MP 149 lir, opposition MP 78 aser regional parties nungi MP 17 lir.

Tamil Nadu nung AIADMK lenir C Ve Shanmugam-i state assembly election nung takok anguba sülen MP menden toktsüba ajanga menden azüingteta by election agitsüa akümer. Vijay-i aniba TVK-i iba mendenji angutsüa akok.

Maharashtra nunga NCP lenir Sunetra Pawar-i state assembly election nung takok anguba sülen MP menden azüingtettsüba ajanga by election agitsüa aküm.

Karnataka nung Congress-i menden

pezü nungi asem nung aser BJP-i menden ka nung takok angutsüa akok. Madhya Pradesh aser Rajasthan na nung BJP-i menden anana nung aser Congress-i menden kaka nung takok angutsüa akok.

Andhra Pradesh nungbo Telugu Desam Party (TDP)-i menden pezüprongla nung takok angutsü aser Gujarat nung BJP-i menden pezüprongla nung takok angutsü.



May 22, 2026 nü New Delhi nung Chief of the Army Staff (COAS), General Upendra Dwivedi-i High Commissioner-Designate of India to Bangladesh, Dinesh Trivedi den senden amendang tangokba noksa nung angur.

बैंक ऑफ बड़ोदा Bank of Baroda
Regional Office, Jorhat, Crystal Enclave, Seuni Ali, Borpool, A T Road, Jorhat-785001 (Assam)

ADVERTISEMENT
Bank of Baroda-i NH394A, Chumukedima, Nagaland-797103 nung ground floor nung tasazük approx. 100 sq. ft nung Offsite ATM amenoktsü aser iba denji RAMP facility aser power peria alitsüla, iba atemaji kiburtem/ Power of attorney holders dang nungi offers meshir. Iba tesemji ita 2-3 tsüingda agitsü atema renemtsü mesüra renema alitsü. Offers agütsürtemi offers ji sealed cover temeja ana nung superscribed **Technical bid aser Financial bid** ji Assistant General Manager, Bank of Baroda, Jorhat Region, Crystal Enclave, Seuni Ali, Borpool, Jorhat - 785001 dangi 14.06.2026 anogo tashi nung mesüra iba anogo matongdang yoktsüla. Talisa Public Sector Units / Govt. Departments nem maongka agütsütsü. (Osang tejangja atema onok indang web site www.bankofbaroda.bank.in nung aliba Tender section nung reprangang) kuli kecha magütsüi offers agizüksü mesüra magizüksü temedenji bank dak lir.
Place: Jorhat Sd/- Assistant General Manager
Date: 25.05.2026 Jorhat Region

बैंक ऑफ बड़ोदा Bank of Baroda
Regional Office, Jorhat, Crystal Enclave, Seuni Ali, Borpool, A T Road, Jorhat-785001 (Assam)

ADVERTISEMENT
Bank of Baroda-i Kohima Main Town, Nagaland-787001 nung ground floor nung area tasazük approx. 100 sq ft nung Offsite ATM amenoktsü aser iba denji RAMP facility aser power peria alitsüla, iba atemaji kiburtem/ Power of attorney holders dang nungi offers meshir. Iba tesemji ita 2-3 tsüingda agitsü atema renemtsü mesüra renema alitsü. Offers agütsürtemi offers ji sealed cover temeja ana nung superscribed **Technical bid aser Financial bid** ji Assistant General Manager, Bank of Baroda, Jorhat Region, Crystal Enclave, Seuni Ali, Borpool, Jorhat - 785001 nem 14.06.2026 anogo mesüra iba anogo matongdang agütsütsüla. Talisa Public Sector Units / Govt. Departments nem maongka agütsütsü. (Osang tejangja atema onok indang web site www.bankofbaroda.bank.in nung Tender section nung reprangang) kuli kecha magütsüi offers agizüksü mesüra magizüksü temedenji bank dak lir.
Place: Jorhat Sd/- Assistant General Manager
Date: 25.05.2026 Jorhat Region

**Form No. 3 (See Regulation-13 (1)(a))
DEBTS RECOVERY TRIBUNAL GUWAHATI**
Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati-781007 (Assam)

Case No.: OA/651/2025
Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No.: 6011
HDFC BANK Ltd VS
M/S A. L. ENTERPRISE & Ors

To,
(1) M/S A. L. ENTERPRISE
A Proprietorship firm, Represented by its Proprietor, MISS AVIKALI I YEPHTHO, Daughter of Mr. Inaho Yeptho, Address: 5R, Chekiya Village, Opposite ARTC Camp, Dimapur, Nagaland - 797112.
AND/OR,
M/S A. L. ENTERPRISE
A Proprietorship firm, Represented by its Proprietor, MISS AVIKALI I YEPHTHO, Daughter of Mr. Inaho Yeptho, Address: House No.58, Block 1, Chekiya Village, Near Chekiya Ground, Dimapur, Nagaland-797115.
(2) MISS AVIKALI YEPHTHO
Daughter of Mr. Inaho Yeptho, Resident of: House No.-C-026, Near Dunlop Factory, Village - Thilixu, B-V, Dimapur, Nagaland - 797112.
(3) MR. INAKA YEPHTHO
Son of Inaho Yeptho, Resident of House No.58, Block 1, Chekiya Village, Near Chekiya Ground, Dimapur, Nagaland-797112.
AND/OR,
MR. INAKA YEPHTHO
Son of Inaho Yeptho, Resident of House No.22, Khermahal, Nearby AO Church, Dimapur, Nagaland - 797112.
(4) MR. LUCKSON SUMI
Son of P.K. Laxman, Resident of: House No.-C-026, Near Dunlop Factory, Village - Thilixu, B-V, Dimapur, Nagaland-797112.

JAKER
05/05/2026 anogo nung Presiding Officer/ Registrar matsüingdang OA/651/2025 benoka liasü.
Iba Tribunal-i sentsüh Rs.27743253.89/- alanzüktsü atema na anema benokba (OA) nung iba Act nung section 19(4) kübok shia aliba Application nung ajemdaker jaoker/notice agütsür (application den documents densema lir). Iba Act nung section 19 kübok subsection (4) nung ajemdaker na aser defendants dang teküboklen agüja alibatem tuyur.
(i) tajaba agütsüba sülen anogo semer nü tsüingda relief asoshi mepishibaji kechiba magütsütsüla, iba kuliji sayutsü metetdaksür;
(ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;
(iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;
(iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;
(v) Ordinary business ajanga secured assets mesüra tanga assets aser kiojen nungi yokzükba senji security interest soita aliba bank mesüra financial institutions indang account nung deposit asütsüla.
Nü dang tezüluba nung sangdong applicant nem agütsütsü tuyur aser 19/06/2026 anogo nung anepdang 10:30 ako nung Registrar matsüingdang arutsü tuyur, yamaji meinyakra application ji angadangtsü aser na meliakka telemtetba agitsü.
06/05/2026 anogo nung tsüinglanglen kü meyongnem den iba Tribunal indang seal agütsür:
Sd/- Registrar,
Debts Recovery Tribunal, Guwahati



TIR YIMYIM YIMOBILEM (EDITORIAL)

DIMAPUR

KÜPTOKNÜ

MONUPII 23, 2026

Ebola Tashidak

- Tangsen Lemtur

Meimchir ajaki temang anema dang liner, ibayongji shirang/tashidak tapu balala aneptsü atema mozü achir mesüra tashidak nungi jenbua alitsü atema vaccine agir. Ajioda alima nung meimchir tashitemetet ajanga tashidak aika koktettsüsa mozü tapu balala yangluteter aser item jagi tashidak aika aneper. Ajisüaka tashidak/wara kar atemabo tang tashi mozü meyangluteter aser mapang shia tashidak tasen pokteter aser ibaji ajanga aika meküzmükteti asür. Yamaji mapang shia poktetba tashidak kaji Ebola ya asütsü. Tawa Democratic Republic of Congo nungbo ano iba tashidak asentenshir poktetogo aser par kidanger linüktem nunga prokshidar. 1976 küm mezüng Ebola tashidak putetba sülen Congo nungbo tang agi 16 benbuba Ebola tashidak pokteter. 2014-16 küm iba tashidak ajanga nisung 11,000 dak tali asü aser 2018-20 nunga iba tashidak ajanga nisung 2,300 shi süogo. Taoba Amongnü World Health Organization (WHO)-i Ebola ya 'public health emergency' lir ta sangdongogo aser nisung 138 asüba metetdaksüogo. Iba tashidak azüoktsü atemaita aika agitsü ta WHO-i shiogo. Ano külenbo iba tashidak ya tzü-mopung ajangabo memenar saka saka tayimtsü ajanga ainlen senzürtemi tashidak melamela prokshitsü akok. Ibayongji India nunga sorkar tetuyuba kübok airport nung screening tenzükogo. India nung Directorate General of Health Services (DGHS) aser Ministry of Health & Family Welfare-i Congo, Uganda aser South Sudan nungi arurtem aser tawa item linük semdang jak dang iba osangji Airport Health Organisation (APHO) nem metetdakjang ta tuyuogo. UAE, Bahrain aser Jordan linüktemibo Central Africa nung, talisa Congo, Uganda aser South Sudan linüktem nungi bendangertem marudaktsür. Iba denji külemi linük aikati pei nüburttem dang Ebola tashidak aliba linüktem mesemdangtsü tuyur. Ashiko, shibai metet iba tashidak ya Africa nung aliba linüktem nung dang masü saka alima tesem ajaklen prokshitsüa akok. Iba tashidak atongdang tamasabo yimra amai atongtsüa akok aser hopta ishika tsüngda iba tashidak mesen jagi temang metadaktsütsü, tekolak angotsü, shi tetsü angotsü, terok ashitsü, tashi lulatsü, tebok ashitsü aser chi mebangnangtsü. Yamaji tashidakji tuluba akümdangbo temang telunglen azü ayimtsü aser tenük, tenarong aser tenilen nungia azü alutsü. Iba tashidak agi shirangertem karbo azü saaktsütettsü mesüra tebok aodang azü dena aotsü aser teküp nunga küplen adoktsü. Küm 10 tejaklenbo iba tashidak nokdangtsü atema vaccine mesüra aneptsü atema mozü maliasü, ajisüaka tangbo iba tashidak atema vaccine aser mozü yanglutetogo. Ajisüaka tang tashi Bundibugyo ebolavirus (BDBV) strain atemabo vaccine aser mozü yangluteta mali. 2019 küm tatabanglen China kübok Wuhan yimti nung 'COVID-19' ta ajaba coronavirus tashidak poktetba mapang nung aikati iba tashidak agi asen limabo matongtsü ama bilema liasü, saka coronavirus tashidak agi asen lima-a tonga aika süogo. Alima tesem aika nung tashidak wara tasen tapu balala adokaka aiben Naga nungerbo item tashidak jagi memeneper. Ajisüaka shibai metet, manger sangwa nung asen lima nunga Ebola tashidak ya bulua prokra shisabulutsü kaji-asen lima nung iba tashidak putettsüsa oset makatsüa akok aser shirangertem junga anepalutsüsa doctor/nurse tem renema malitsüa akok. Iba ama tiaji ajurura asen lima nungbo nisung jenti remoka süadoktsü!

OLEMSABANG

Ajemaluba aser Ochishiba nung temoatsü

Imtikumla Imchen

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

(Yashi adok nungi...)

Anungji iba kümji yimerajak khristmas benjong chiyunga among Tsüngremer, temoatsü tulu nung New Year-a longsopepa jaka ka nung dang sarasadema mungger atem. Reprangra alinung iba kümji tetsür teri (10)ita asem tsüngda tanur tebur ter(10) aso. Ibaji yimkümer temoatsü tulutiba ta züngshi aser kodanga matalokdangba atalok nung mezüng asoba tanur tenüng Moatiba ta aja. Aser parnok teku(9) jia tetezü aketba tenüngtem dang jataksü. Parnok ajak kanga junga inteta terburji kaka aküm. Tasüngkümji kasa dang tsük jenti aro saka yimti aika nung ayawara arua chiyungtsu dang masü kiset shirurua tasüba aru, süngoliwa kecha madok.

Iba tia nung nisungtem machi majem agi okrongseta aküm saka koba yim küm ana tashi azükaruba ama par yimerbo kasa dang moatsü. Anasatepa alir yim karbo par yimer dangsa meshia chiajema ali. Idangji ajaki Yosef taküm atishia jembi. Iba mapang yim ka nung tsürabur malir tanur ana kangasa timatem saka Tsüngremi yaria takümbo küzmük. Iba mapang tsürabur Tsüngrem akümstübur chir tambusanger kinungerbo ajak süadoker ali nung yimtisangeri par kibonga ayawara nung aten asübo par tama sür lila ta tansütsü O jembia liasü.

Idangji tetsür parnok asebrongla kiyi-i oa takar kidang anen. Kibong ajak nem Tsüngremi jala jabaso tajung moatsü. Tetsütem ajaki tsürabur sayu O mesendoki ali nung Tsüngrem aküm tsübur, ochi shir aser temeim aketba tetsütem dang liasü. Parnok dak temeim aketba shisatsü ali nung yimer ajaki tajung mapa ajak nung lartemsa atishia jembi. Tetsütemji pei akaba ajak timtemer den lemsatebpa alir takümtem asü nung yimtak arogo, yimten aser lokti balalai kechisa ayongzükdir parnok tamasür inyakasa aru. Aser tetoktepba mapa nunga parnoksa tajungba adok.

Kidang tanur den kipok tekülem agiasa aru iba sayubentsü aser tazüokba teti melangtangi aliba agi tanurtem ajak kasa dang mapa nung tetangshi aser Tsüngrem akümstübuba yimya jakla ajungbaji ajaki nükshiasa ali. Joko tanurtem ajak tain kümer mapa ajak koka inyakba mapang alima tensa tamajung tia ka ajuru. Koba sepaitemi yimtak alir tebur ajak jatena ki ka nung shibanga yur ka ken ka ken ta jateta O asüngdanga zükmeso. Kanga rishikangshiba temelungi maremetji tetsürtema ajak kasa jaka jagi arua tebu aser chirnur dak azükbaji ngua ajepba olaji yipru tulu ka arur amai nanung tulu adoka ajep. Iba anogo tepeyong tetsü asemji ki ka nung sentepa tebu aser techir asoshi Tsüngrem dang teküzmükba meshia parnok maru tashi sarasadema ata. Anogo tepeyong sepaitemi tebur ajak züka arur joko mangsema aküm nung tanishibai tebur ajak chiokang ta mela. Idangji par kibong asem tebu aser techirtem to ano mejai alidang chioktsü mapang mela nung pelaseta kidangi aru. Tazüker rongnung karbo menokdakteti aliba ngua chioka doktsü. Tazüker ajak kima alena yutsür liasü. Parnok kibong maja dang chiokji parbo shinga mazük kidangi shilang. Kodang parnok ki atong tetsütem ali nung apudaker tashi agi ayimtena parnok küzmüktsü asoshi sarasadema liasü. Kodang parnok ajak ki atong tetsütem sarasadem ajanga parnok ajak küzmüka aruba atema Tsüngrem tenüngsanga tepela lemsatep. Tsüngrem O-i ashi ama temeshipurbo lendong timtem ajak nungi küzmüker temenen ket nung magütsür ta ashiba angateta pelatep. Iba tatalokba ajanga ano Tsüngrem anasai tali odi ta jembiteper tepela nung senshi. Paonungji yimer kibong aika nung tasüba khuret amai dang jashitepa liasü. Iba tatalokba ajanga yimer ajaki Tsüngrem bushia kibong aika melenshi. Iba anogoji Missionaryba ain-i oadoker liasü aser ano parbo tanur teburtemji tanur dang nübü majungba agi sepaitemi meindok.

Yamaji kodanga matalokdangba ka par yimtak atalok. Tsüngrem O-i ashi ama tsüraburi Tsüngrem akümstübuba nung chirnur putu merijangsa merijang aochitsü aser süngdong tajung nung süngjang tajung atanger ta ashiba ama par kibong tsürabur temoatsüji mapang shia chirnur, semchirtem den ataloka liasü.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Arogo garitem nung stickers nokdangba ya agientsüla: NJCF



May 22, 2026: Nagaland nung Khristan organisations-i sorkar dang Arogo mesüra Khristan rejutem indang garitem nung 'logo' aser yimsü dak sendakba maitsü balala indang stickers nokdangba ya agientsüla, ta mepishiogo.

Taoba ita state transport department-i iba tenokdangba osang metetdaksüba sülen May 18, 2026 nü Nagaland Joint Christian Forum-i iba tetuyuba ya agiendaksüner, ta mepishia shidi ka agütsüogo.

Sorkari nija aser public gari kiburtem dang gari nung yimsü dak sendakba ozülu, rejutem indang maitsü aser melungtet teloktem indang temaitsütem inoka alibaji anogo 45 tsüngda agienadokang, ta tetuyuba agüja liasü.

Christian forum-i shidi ajanga state sorkar dang, mapang talangka nungi Nagaland nung Khristantem maitsü atema Arogo nüngja aser yimsü dak sendakba ozülu

balala amshia arur, ta metetdaksü.

Nagaland Joint Christian Forum (NJCF)-isa, Khristan maitsü atema state-i nüma atanger, ta ashi.

NJCF-i, "Tenla kitem aser Khristan temaitsütem, talisa Kangki ya akhidang nungi yimsü maitsü lir aser Nagaland nung alirtem maitsü lir," ta metetdaksü.

Christian Forum-isa, garitem nung Arogo tenüng mesüra Khristan temaitsütem amshibaji maongka mesüra 'special treatment' bushiba ama mezüngshitsüla; India tesem balala nung garitem nung yimsü balala indang temaitsütem amshir, ta metetdaksü.

Arogo nung lenirtemisa, Arogotem indang gari jangjaba ajanga tebilemba aika ataloker; talisa rongdak pastor temi semdangba mapang, asüpila sentongtem, aonung ainlen senzüdang aser yimsü

dak sendakba tongtibang sentongtem atema gari nung maitsütemji tongtibang, ta metetdaksü.

Nagaland Joint Christian Forum nung joint secretary, George Rino-i, iba tetuyuba ya linük temzüng süra kechiba iba tenokdangba ya talisa Nagaland nung ang benoker?, ta asüngdang.

Paisa, Arogo dak sendakba temaitsütem gari nung inyokba ajanga shinga mejashidaksür mesüra temelung meyirutsür, ta metetdaksü.

Arogo tentettem aser lokti tentettem-a aikati, iba tetuyuba ya linük temzüng kübok yimsü temeden aser Naga nung sobaliba dak sendakba den meputep, ta metetdaksü.

Phom Baptist Christian Association-i, garitem nung Arogo tenüng aser yimsü temaitsütem amshibaji talisa maitsü jangjatsü aser community service atema lir, ta metetdaksü.

Andhra Pradesh state nung Pastor ka den Khristan tenet apu

May 22, 2026: Andhra Pradesh nung police-i Khristan sayutsüngir ka aser pa den külemi inyaksemer nisung tenet puogo.

Khristantem jagi tiyazü nung parnok anema inyak ama sayu, ta parnok nem tai tonglokja apu.

May 19 nü Pastor Dara Abhinaya Darshan aser pa den külemi inyaksemer apu. May 18 nü Alluri Seetharama Raju district kübok tribal yimtsüng Neeruthotapalem nung Khristantem jagi tangartemi parnok amak ama sayutsü merang, ta parnok nem tai tongloksü.

Khristantem jagi, parnok gari ka nung aoba mapang yimdaklirtem jagi parnok arishia amak ta ashi aser iba tatalokba noksa aser video aika social media nung prokshia liasü.

Osangbenertem den jembidang district police tongti,

Amit Bardar-i, Khristantemi parnok meimdaksütsü aser pastor Dara-i tentetba Bharosa party pusemdaksütsü nükjidong nung Khristantem jagi tiyazü nung parnok amak ama sayu ta bushitetogo, ta metetdaksü.

Audio recordings, social media aser senostsü dak sendakba osangtem ajanga iba tatalokbaji taila liasü ta jangjaogo, ta police-i metetdaksü.

Iba dak sendakba nung police-i Khristantem anema ozüng alema adenshiba, yimsü telok balala tsüngda tsükchiteptsü ajungshiba aser yimsü balala amangertem temelung yirutsütsüsa inyakba ken otem benokogo.

Iba region nung Khristan lenirtemi, item ama tatalokba ajanga chichiba Khristan ministry tem tenüng menüksür, ta aitsü.

Guntur diocese nung taoba

mapang chancellor, Madhu Balaswamy-i, "Iba tatalokba ajanga state nung Khristantem tenüng menüksüogo," ta metetdaksü.

Ajisüaka paisa, tamalen Pastor Darshan-i tribal nisungtem atema mapa tajung aika inyaksüogo, ta metetdaksü.

Andhra Pradesh Christian Leaders Forum nung chairman, Oliver Rayi-i, iba ya yimsü tenüng amer mapa tamajung inyakba lir, ta aitsü.

Telangana United Christians & Pastors Association nungi Goneh Solomon Raju-ia tamangertem dang pei nija tajangzük angutsü atema tim masüba nung yimsü amshiba mita alitsüla, ta metetdaksü.

Khristan lenirtem aikati, tamangertemi khen ochimeshii inyakba ajanga nüburtemi Khristantem dak melung melemtetsü, ta metetdaksü.

ANOGO ABEN TSÜNGREM DEN

Shibai Parnok Idakji Yutsü ?

T.Ken 75:1-10

Kodang nüburtemi peisasa temaba atur aser mezüngbuba asütsü meranger, tekong 7 ji azüngtsü junger: "Saka Tsüngremji o bendanger. Pai ka ludaktsür, ka tudaktsür." Iba yagi asenok asükümba arütsür. Nüburtem kechi jenjang nung lir parnok idakji alitsü shibai mela? Tsüngremi Yohan Baptitsübai ashi, "Kotak nungi nisung nem kechi agütsür iba dak alema, pai kecha angutsü makok" (Yn. 3:27). Peteri zülu, "Anungji mapang tetemsü nung nenok uludaktsütsü asoshi, nenoki nenok sasa tashi taitba teka kübok ajemalua kümang" (1Peter 5:6). Shibai tanishirtemi temaba jenjang nung ulutsür? Tsüngremi. Shibai temeba menden nungi teküpbokbai uludaktsür? Tsüngremi. Ibai inyaksü shiba shisa aka? Tsüngrem. Pa kechi jenjang nung lir aji Tsüngremi pa idakji nüngdaker ta shingai mebilemtsüla.

Asenok kong lir idakji lir, kechiaser Tsüngremi asenok idakji yutsü ta asenoki angatetdi. Tekong 7 jagi asenok asükümba dang arutsür masü- iba yagi aremzüktsü ajungshir. Yosef taküm bilemdangang, pa tsükchirtem ludaktsütsü aser pa kechi nung alitsü tim ataa ali. Mosa aser Nehemiah indang bilemdangang. Asenok taremzük koda nüngdak! Ken ken Tsüngremi pa nübur taochi makaba yimsüsür kübok yutsür. Asenoki mulungba raksatsü asoshi Tejen Lai nung ama, Tsüngremi mapang tamajung ajanga odaktsür aser asenok tali pa mesüka kümdaktsür.

Tasembuba, iba yagi asenok taküm nung shisa bulu pungpadaktsür. Na tanishir menden nung lir asü? Tsüngremi na idakji yutsü. Tsüngremi na idakji yutsü nungji Pai mulungba tashi na idakji alitsü. Pai shimtetba leman nung Tsüngremi na amshitsü. Asüküm masütsü kümdangang. Kodang asenoki asükümdir aser mezümekümdir, Tsüngremi ashir, "Ibai na alutsü mapang lir." Saka asenoki asen tila kümra, Tsüngremi ulutsütsü. Pa tekai asenok ajungkettsü. "Tsüngremi asükümer nokdang, saka ajemalur nem taochi agütsür" (1 Peter 5:5).

Tanishir tajung kübok na mapa inyakdak mesüra arogo nung timtema alir asü? Tangari telemtetba tamajung agiba agi parnok idakji yutsü asü? Ne khuret ajak Tsüngrem dangi bener arung aser itemji lemsatepang. Maneni aotsü Pa dang tashi asüngdangang aser Pai obendangtsü ta bilemtettang.

CSW-i Mexico nung missionary ka samaba bushisüngdangtsü akhanger

May 22, 2026: Khristan ajisüaka yangji aliba melungtet telok Christian Khristantemi pa tang tashi mangur.

April 13 nü par kibong züngsemtemi Guerrero state nung aliba National Search Commission nem pa samaba osang metetdaksüogo.

CSW-i Mexico nung arrshi Benito Guevara Arcos Mexico nung mapang shia samaba bushisüngdangtsü atema takhangba agütsür. Hopta trok tejaklen Guerrero State nung prangpong amer telok kati pa puer oa liasü.

Missionary Guevara Arcos ya tesüsa March 31 nü San Vicente nung angu. Iba yimi nungji sayutsüngitsü aser Laishiba lema agütsütsü atema pa iba tesem jagi oa liasü.

Osang angazükba agi, pai sayutsüngibaji prangpong amer telok kati ashishia pa puer ao.

Tesülen iba telok jagi, April 4 nü Amojileca nung pa chiokogo ta metetdaksü

April 13 nü par kibong züngsemtemi Guerrero state nung aliba National Search Commission nem pa samaba osang metetdaksüogo. Mexico nung mapang shia ozüng alema inyakba telok balalai Khristan lenirtem puer aoer mesüra tepseter. Mexico nung region tamajungtibaji Guerrero State ya lir.

Ano tanga osang ka nung, CSW-i linük 8 nung aliba Nicaragua nung embassies aser consulates nem petition ka agüja tangsa Protestant pastor Efrén Antonio Vqlchez López chiokang ta takhangba agütsüogo.

Pastor Vqlchez López ya 2022 küm May 15 nü apu aser pa küm 23 tepuokdak ayutsü obendang agütsüba sülen pa tepuokdak küm pezü jungogo.

AO OSHI ANGAZÜKDAK: TANÜ ANGAZÜKTSÜBA OJANG



Yazimara

(adj) ochi masü, purapuji (dishonest, fictitious)
* Yazimara o jembir dakbo shingaia temulung malemer.

Yaziyabong

(adj) ochimashi, shitak mejembiba (falsehood, not honest)
* Tanü asüng lenirtemia yaziyabong kanga jembir.

OLONG PAITEP # 7512

	1		2		3		4	
	5							6
			7					
8		9					10	
		11						
12							13	14
				15				
				17				
	18							

TIPILEN

- 3. Miima agi - (4)
- 5. Tejangko - (6)
- 7. Aou teküp - (4)
- 8. Mako / Melemzük - (4)
- 10. Saklok / Aket - (4)
- 11. Ali nungzüka aluba - (7)
- 12. Talentsü - (4)
- 13. Ak ayudak - (4)
- 15. Ajunga - (4)
- 17. Meyong - (6)
- 18. O jembitsü tashi - (4)

LANGTSÜNGLEN

- 1. Asoshi - (5)
- 2. Tashidak lung - (4)
- 3. Bangsemo endok - (4)
- 4. Nütsüng züngdangba - (7)
- 6. Tsüngpret - (6)
- 7. Asüng sür külen - (4)
- 8. Hai-haura aka - (6)
- 9. Telongtet - (7)
- 10. T__ - (4)
- __ __ tiba - (4)
- 14. Tali / Onsara - (5)
- 15. Bilemdanger - (4)

OLONG PAITEP # 7511 TELANGZÜBA


TIPILEN :

- 1. Taa, 3. Teküm, 6. Aibelen,
- 7. Aut, 9. Ajizük, 10. Ojala,
- 11. Semer, 13. Sen, 15. Kioktsü,
- 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

NAI-A YA METETTER MA



Cristiano Ronaldo-i aniba Al Nassr tema-i Brehostibarnü Saudi Pro League kokogo. Parnoki Damac FC goal 4-1 agi akokba sülen iba league koka liasü. England, Spain aser I taly nung league akokba sülen Ronaldo-i tang Saudi Pro League-a kokogo.

Assam nung tanabuba emergency landing facility amenoktsü

Guwahati, Monupii/May 22 (Agencies): Nalbari district administration-i National Highway 27 nung kilometre 5 talang Emergency Landing Facility (ELF) ka yanglutsü atema temelaba agütsüogo, koba Assam nung ibala mesükba facility tanabuba asütsü.

ELF yanglutsü atema benoker aliba ya Tihu aser Madhapur na tsüngda highway nung asütsü, koba auxiliary runway ka kümdaktsütsü, kong jongkdak mapang military transport tayimtsü aser civilian

commercial tayimtsütem anena apusotetsü. Ketdangsurtemi ashiba agi, iba project pa national security dak sendakba nung tensa balala, yipru mopung aser menoknok amala lendong mapang aser sepai aser osettem belenshitsüsa jongdak mapang logistics aser operational hub ka ama inyaksangshitsü.

Ketdangsurtemi ashiba agi, iba runway ya military operational standards ama aser tayimtsü tulu inyaksangshitettsüsa yanglutsü.

Zoning regulations aser tayimtsütem kecha tetsükdaktsü makai senzüsenpongtsü atema tayimtsü senzüba lenmang nung no-construction zone tem amenoktsü atema National Highways Authority of India (NHAI) aser local ketdangsurtem sendaktepa inyaksangshidar.

Assam nung mezüngbuba Dibrugarh anasa emergency landing facility ka inyaksangshi tenzüka sülen tang iba ELF ya amenoktsü atema jenjang agidar.

Kuki CSO Working Committee-i Mongkot Chepu yimtsüng amakba metetdaktsü

Imphal, Monupii/May 22 (Agencies): Kuki CSO Working Committee-i, May 21 nü Manipur kübok Ukhrul district nung Mongkot Chepu yimtsüng amakba metetdaktsüogo, aser iba tatalokba dak sendakba nung AI-generated osang tai prokshiba atema telok kar aitsüogo.

Committee-i sangdong ka ajanga ashiba agi, NSCN Eastern Flank den sendaktepa

aliba nisungtemi Litan-Sareikhong belt nung iba yimtsüng ya nikongtsütsü 2:5 ako nung amak tenzüka liasü.

Committee-isa, iba yimtsüng amakba sülen yimtsüng nung volunter temia meyiper rara tenzüker aser telok ana tsüngda

ghoda aika khatapa liasü. Telok ana tsüngda nikongtsütsü 5:30 ako tashi khatapa liasü, ta metetdaktsü.

Maneni iba lokti tentet yagi ashiba agi, yimtsüng amakertemi injang aser bomb tesashi amala jenjang tasak hadirtem amshia liasü. Parnokisa iba yimtsüng amakba ya mepetmesü adoker aliba tesem nung tensa tamajungba kümshiba lir, ta ashi.

Kasa mapang nung committe-i, May 19 aser 20 nü Mongkot Chepu drone amshia ladangba indang süoki ia bilemba lemsatepogo. Parnoki ashiba agi, drone tem ya Sikibung yimtsüng nungi yokba ta jangjaogo, aser iba yimtsüng

amaktsü atema renemtsü asoshi ladangba asütsü ta bilemer.

Iba den bendeloksema iba Kuki nunger lokti tentet yagisa, Kuki nunger telungpurtemi Sikibung yimtsüng amakba ama sayua social media nung AI agi generate asüba noksatem prokshiba atema telok kar aitsüogo.

Committee-isa, noksa aser osang teyazü prokshia Ukhrul aser Kamjong district kübok tesem kar nung tensa tamajungba kümdaktsütsü meranger ta ashi.

Iba lokti tentet yagisa kuli kecha makai Kuki nunger yimdaklirtem telungpurtem ama kümtsüba ya temzüng ozüng anema lir aser merenshitsü langa lir, ta ashi.

Mizoram nung 'No Official Vehicle Day' sangdongogo



Aizawl, Monupii/May 22 (Agencies): Asia anüolen rara ajanga mepetmesü adoker aliba mapang totzü arongba aser senotsü entokba tajemba kümdaktsütsü atema Mizoram sorkari jenjang kar agiogo, kong "No Official Vehicle Day" aser kidang nungi dang mapa inyaktüsüba amala jenjang kar agiogo.

Alima ajunga mepetmesü nung aliba mapang Ato Kilonser Narendra Modi-i totzü kümzüka ayutsü atema mepeshiba sülen General Administration Department (GAD)-i tetuyuba agütsüba ya Brehostibarnü nungi benoka inyak tenzüko, ta ketdangsur kati ashi.

Inyakyim tasen kübok Bodhbarnü shia ya "No Official Vehicle Day" asütsü, aser iba anogo sorkar tenzükerter aser ketdangsurtem official gari

amshitsü melena tetsüng agi jajatsü mesüra public transport amshitsü ayongzüko.

Sorkarisa, department ajak dang employee shilem 20 bo kidang nungi mapa inyaktüsü atema anepalutsütsü tetuyuba agütsüogo.

Healthcare, emergency response, water & power supply, transport services aser law enforcement agency tem ama service tembo akhi ama dang inyaksangshitsü.

Gari senzüsenpong nung tetsükdaktsü adokba aser totzü tajemba amshitsü atema sorkar office tem ya shift ana kuma lemsar inyaksangshitsü.

Ketdangsurtemi ashiba agi, agriculture, education, power aser General Administration Department densema department 20 anepdang 8:30 nungi nikongtsütsü 4:30 tahi

inyaksangshitsü aser ano home, health aser disaster management densema department 20 anepdang 10:30 nungi nikongtsütsü 6 ako tashi inyaksangshitsü.

State aser tangalen official senzüsenpong tajemba kümdaktsütsü asoshi sorkarisa tsüngdong oa senden amentsü melena video conferencing ajanga senden balala ametsü tetuyuba agütsüogo. Maneni ketdangsurtem takok tashi bendangleni maotsü atema jenjang agitsü metetdaktsüogo.

Chief Minister Laldhuma, minister tem aser ketdangsurtem dang vehicle convoy tajemba kümdaktsütsü mepeshia metetdaktsüogo.

Maneni sorkar office tem dang office mapang tembangba sülen light, fan aser electrical appliance tem sepa ayutsü tetuyuba agütsüogo. Air conditioner tema nüngdakba mapang dang amshitsü tetuyuba agütsüogo.

Department tem dang sa senotsü amajok nung mintoktsü atema takoktsü dang süra benjung balala ayongzüka mamungtsü ayongzüko, kong government healthcare institution tem densema lir.

Israel-i southern Lebanon nung nisung 11 tepset

Beirut, Monupii/May 22 (Agencies): Israel-i southern Lebanon amakba sülen nisung 11 tepsetogo, kong healthcare worker tem densema lir.

Israel-i Hokolbarnü Tyre district maka liasü. United States teyongtsü ia Israel aser Lebanon na tsünga ceasefire benokba sülena linük ana maneni kati ka maktepar.

April ita tom nung ceasefire benokba sülen Israel-i tesem balala amakba mapang nisung 400 dak tema tepsetogo.

Israel-i Hezbollah pur maneni amaksü ta shia arudar, koba ceasefire dak sendakba nung Lebanon sorkar den nangzüktepa anema lir.

Deir Qanoun en-Nahr municipality nung nisung trok asüba jangjaogo, kong paramedics ana aser tanur ka densema lir. Kasa mapang nung iba tesem nung km 12 pila Hannaouiyah jila nunga paramedics pezü tepsetogo. Maneni Nabatieh yimti nunga nisung ka tepseta liasü.

Israel-isa, Hokolbarnü anüing ajanga southern Lebanon kübok tesem balala makogo, ta state meyong National News Agency-i metetdaksü. Israel-i amakba tesemtem rongnung Tyre district nung yimtsüing pezü amakba densema lir.

Israel military-i Lebanon nung health facility aser medical team tem maka arudar aser item tesemtem ya prangbong injang aser sepaitem jenokdaksütsü atema amshiba asoshi Hezbollah aija arudar.

Ajisüaka iba taitsüba ya Lebanon sorkari magizüki

arudar. March ita tetenzüklen nungi Israel aser Hezbollah na raratep tenzükba sülen healthcare workers 116 tepsetogo, mozüki 16 raksaogo aser ambulance 147 makogo.

Health Minister Rakan Nassereddine-i tawa, health sector maka raksatsüba atema Israel aitsüogo.

March ita Iran-i teyari agütsüba Hezbollah puri Tehran pusemba sangdongba sülen Israel-i parnok amak tenzükba liasü.

Iba sülen Israel-i Lebanon nung nisung 2,896 tepsetogo, nisung 8,824 dak tema yirutsüogo aser nisung million 1.6 pei talidak ki toktsür jenshia odaktsüogo.

United States teyongtsü ia benokba ceasefire ya April tom nungi tenzük. Ceasefire atema sensaksemba ya küm semer dak tema lir külen Lebanon aser Israel na indang indanga sensaksemba liasü.

Taoba hopta ceasefire ya anogo 45 atema atsülangogo, saka Israel aser Hezbollah na maneni raratepa arudar.

Taoba küm August ita lebanon sorkari Hezbollah pur disarm sütsütsü nangzük, saka iba mapa ya kanga tasak liasü.

Brehostibarnü US-i iba telok den sendaktepa aliba nisung teku nem tenokdangba agütsü, kong Iran dangi Lebanon ambassador densema liasü.

US Treasury's Office of Foreign Assets Control-i ashiba agi, tenokdangba agütsürtem ya Lebanon indang parliament, military, aser security sector tem nung inyakertem lir.

DR Congo nung nüburtemi Ebola mozüki süki rongtoktsü

Kinshasa, Monupii/May 22 (Agencies): Eastern Democratic Republic of Congo nung Ebola tashidak kanga mejungi pokteter aliba tesem ka nung, iba tashidak agi asü asütsü ta temulung melemi bilemba asangur ka tasümgang aremtsü atema magütsüba sülen nüburtem meita adok mozüki ka rongtoktsü.

"Parnoki mozüki dak projectiles mereploksü tenzük. Parnoki isolation ward ama amshiba süki dena rongtokja liasü," ta local yimden yimsüsür Luc Malembe Malembe-i Rwampara General Hospital nung tatalokba indang BBC nem metetdaksü.

Mepetmesü adoker aliba mapang police temi nüburtem senshidaksütsü atema injang khatoka liasü.

Ebola tashidak agi asür tasümgang ajanga tashidak mena aotsü ana nung lir asünung iba mesen prokshia meyoktsü atema ketdangsurtemi kanga anepalua aremtsü nungdaker.

Ituri province kübok Bunia yimti anasa amenoker aliba Rwampara mozüki nung medical worker tem ajak military teküzmüka kübok tokja lir, aser police temi tensa azüoktsü merangdar, ta kasa sangdong ajanga metetdaksü.

Sepaitem tonga maru tsünga nüburtemi long onloksüba mapang healthcare worker ka yiruogo, ta iba mozüki nung inyaker kati AFP news agency dang ashi.

Asüsang ya par lokti nung nungtugu nisung ka liasü, aser pa asüba ajanga jashirtemi iba tashidak ya koda tetsübutü aji mangateter, ta Jean Claude Mukendi-i ashi, shiba Ituri nung

Ebola dak sendakba nung security telangzüba agütsütsü asoshi achayanger ka lir.

Tenük kuli agütsürtemi Reuters dang ashiba agi, iba asanguba ya football asaya ka liasü, shiba local team aika nungi asayaogo. Pa tetsü ashiba agi, lar jabaso ya Ebola agi masü saka typhoid tashidak agi asü.

Malembe-i ashiba agi, tashidak koba ajanga eastern DR Congo nung nisung 170 dak tema tepsetogo, iba ya shitak masü ta nüburtemi bilemer.

"Tatalokba dak sendakba nung nüburtem nem tangazükba shitak agüja mali. Nütsünyongsük shilem ka aser talisa yimdak lirtemi Ebola ya bendangertemi yangluba aser iba tashidak ya shitak masü ta bilemer," ta yimden yimsüsür yagi ashi.

"NGO aser mozükitem sen aazütsü atema iba ya inyaker ta parnok bilemer, koba tesasatsü ka lir," ta paisa shisem.

Pai ashiba agi, süki ana den aremtsü atema yua aliba tasümgang ka rongtokogo.

Congo Foreign Minister Thérèse Kayikwamba Wagner-i, iba ya tetsübutü tensa ka lir, ta ashi.

Laisa, tashidak agi kongshir aliba tesemtem nung nüburtem kümzüka toktsütsü, ken o angatetsüda tsütsü aser angashidaksütsü atema ketdangsurtemi inyakyim tali benoka inyakdar, ta ashi.

World Health Organization (WHO)-i, Ebola tashidak agi asürtem ya tasümgang amshitsü atema training shidak alir agiba team temi protective equipment tem amshia remtsütsü tetuyuba agütsür lir.

Lendong atalokba mapang iba mozüki nung shiranger trok temang anepalua liasü, aser osang ajanga ashiba agi, mepetmesü adokba mapang parnok ya jena or alitsü.

Ajisüaka medical charity Alima, shirnoki sükitem ya anepalur parnok ashiba agi shirangertem ajak mozükidang temang anepaludar.

Tashidak poktetba ajanga DR Congo national football team linük yimtiba Kinshasa nung pre-World Cup training camp agitsü aliba thitsüba sülen iba mepetmesü ya adoka liasü.

WHO-i, iba tashidak poktetba ya public health emergency ka aser alima ajanga asoshi teblemetsü ka lir ta shiogo, ajisüaka iba ya pandemic jenjang nungbo masü ta jangjashitsüogo.

WHO-isa Hokolbarnü sangdong ka ajanga DR Congo nung tashidak menar alitsü ta temulung melemi bilemer parnok 750 nungi 177 bo süogo, ta metetdaksü.

DR Congo kidanger Uganda nunga ketdangsurtemi nisung ana dak Ebola tashidak putetba aser iba nisung ka iba tashidak agi asütsü ta bilemba metetdaksüogo.

Tashidak puteter aliba ajanga ketdangsurtemi arrtsü adena tayimtsü, bus aser tanga public transport ajak senzüsenpong masütsü tenokdangba agütsüogo. Maneni Semliki ayong nung passenger amenba rongtem senzütsü memelar. Iba ayong ya DR Congo aser Uganda na arrtsü nung lir.

Iba tashidak ya Bundibugyo ta nungja agütsür aliba Ebola species ka ajanga adokdaksür. Iba species atema tang tashi vaccine yanglua mali aser WHO-i ashiba agi vaccine yanglutsü atema ita teku tashi agitsü.

Brehostibarnü eastern DR Congo azüoka aliba M23 teloki South Kivu province nung nisung ka dak Ebola tashidak putetba metetdaksüogo, koba tashidak epicentre Ituri nungi kilometer noklang aika pilar lir.

Arishi küm 28 tain nisung ka, shiba Kisangani nungi arua liasü, pa tashidak meputet tsünga süatok, ta iba telok yagi ashi.

Kisangani ya north-central Tshopo province nung yimti tulu ka lir, kong tang tashi shinga daka Ebola tashidak puteta mali.

GOVERNMENT OF NAGALAND

DIRECTORATE OF TECHNICAL EDUCATION

NAGALAND: KOHIMA

NO. DTE/ ESTT-2/02/2025-26/ 110

Dt. Kohima, the 21st May 2026.

NOTIFICATION

This is to notify the **Common University Entrance Test (CUET(UG)-2026)** appeared candidates (Subject : Physics, Chemistry & Biology), intending to avail Nagaland State Reserved **Seats in Para-Medical/ Agri & Allied Degree courses**, that the registration forms will be available at the **Directorate of Technical Education, Kohima** (Below Nagaland Civil Secretariat Complex) on payment of Rs. 500/- (Rupees five hundred) only **w.e.f. 1st June 2026** during office working hours. The form may also be downloaded from the **website:- https://dte.nagaland.gov.in** in which case the fee should be submitted in cash along with the form printed in white paper (A4 size) by hand.

Last date for issue and submission of filled form along with CUET Score card to the office of the undersigned is 30th June 2026. If CUET result is declared after the last date of form submission, the CUET score card can be submitted separately within seven (7) days from the day of result declaration.

(Er. VIPULHOU LHOUGU)
Director

GOVERNMENT OF NAGALAND

DIRECTORATE OF TECHNICAL EDUCATION

NAGALAND: KOHIMA

NO. DTE/ COUN-IST/ 1/ 2024/

Dt. Kohima, the 22nd May 2026.

NOTIFICATION

Pursuant to Government Administrative Approval NO.HTE/Administrative approval/ 1-9/2025/457 Dt. 18th May, 2026, the Directorate of Technical Education will be conducting counseling for private Institutions in Engineering & Allied and Medical & Allied courses on **18th June, 2026**, at Government Polytechnic Kohima, towards Indira Gandhi Stadium, Kohima. All eligible candidates are invited to participate in the counselling for admission in the first year and 2nd year (as lateral entry). Also, the empaneled Institutes are requested to confirm their participation on or before 5th June, 2026 through the details given below :-

Er. Ruokuobeilie Mere, Sr. Lecturer.
Ph. No. 8731820910
Email : tenagaland@gmail.com(Er. VIPULHOU LHOUGU)
Director

OFFICE OF THE

CHANGTONGYA SENSO TELUNGJEM DIMAPUR

DIMAPUR: NAGALAND

Motto : Telungjem Aser Teyaritep

Tenüngsang agütsür

Changtongya Senso Telungjem Dimapur (CSTD), Dimapur Changtongyatsür Telungjem (DCT) aser Changtongya Kaketshir Telungjem Dimapur (CKTD)-i teküboklen shilem aliba senso tajungtem nem parnok takok asoshi tenüngsang agütsür.

- Moatoshi aser N. Tainla Jamir na jala **Imliyangerla Longkumer-i** tawa sangdongba HSLC, NBSE tatidang nung Top 13(d) jenjang ngutetba atema tenüngsang agütsü
- Asür Lipokchuba aser Moarenla na jabaso ACP Niuland, **Nokinketba Longkumer NPS-i** District Commendation Certificate 2026 anguba atema tenüngsang agütsür.
- Asür Cherenlepzuk Jamir aser Nukshilila na jabaso 29 Assam Rifles nung **Hav. Sempirong Jamir-i** Governor's Silver Medal, 2026 anguba atema tenüngsang agütsür.
- Takulemba aser Masalemla na jabaso **Imuyanger-i** industries and commerce, Master Craft Person in the state of Nagaland (Wood Works) indang State Award anguba atema tenüngsang agütsü.

Senseo tajungtem ajak tenüng nung nenok takok tajung asoshi onok kanga nema adangba lemsateper aser parnok bendanga agüja, aremzüka aser meranga inyakba ajanga angazütsü lanu putu ajungmesor. Nenok takok ajanga Changtongya nung nem konang tetushi bener arutsüba den ajak ajungmesogo. Tarutsü nunga nenok wadang nung takok ngua inyakyonga aotsü imlaja atar.

Sd/-
Imti Jamir
President, CSTDSd/-
Tiarenla
President, DCTSd/-
Temjenmoa
President, CKTD

Michael Carrick Man Utd indang permanent coach kümogo



Monupii/May 22, 2026 (Agencies): Manchester United-i, coach Michael Carrick den küm ana atema tenangzüktepba yangluba sangdongogo.

January ita Ruben Amorim mapa nungi anentsüba sülen arishi küm 44 tain ya interim coach aküm aser pa lenisüba nung team-i kanga junga asaya-a Champions League atema qualify süogo.

Taoba Middlesbrough coach Carrick lenisüba nung United puri Deobarnü Nottingham Forest akokba sülen parnok Premier League nung tasembuba jenjang nung tembangsü jangjaogo.

Pa lenisüba nung team-i asaya 16 nung 11 akok aser pa Premier League's manager of

the season award atema dena nominate süogo.

January 13 nü Carrick shimba sülen United puri point 36 angu aser top-flight club kati danga january ita nungi tang tashi nung parnok dang nungi point timba ngua mali.

"Ni küm 20 tejakdang idaki aruba mapa nungi ni Manchester United ya khenyongi balaka asüba ajangshiogo. Iba football club anitsü atema maangka anguba ya ni atema kanga dang tetushi tulu lir," ta Carrick-i ashi.

"Tang nükjidong tejangja yur ajak longiemer tejakleni aotsü mapang lir. Manchester United aser onok pusemertem temaba jenjang nung takok asoshi tokteptsü langa lir," ta pai ashi. Amorim-i club toktsüba

mapang United pur jenjang kanga mejungi liasü. Asayatem makokba den Portuguese nunger coach indang tactics aser formation dak sendakba nung mangatettep tali adok aser pa tenure tatemleni aruba mapang tashi nungbo club ketdangsürtem den tesendaktep mejungi kümer liasü.

Carrick ya 2021 kuma Ole Gunnar Solskjaer mapa nungi anentsüba sülen asaya asem atema United indang coach liasü.

Taoba mapang England nunger midfielder ya asayar ka ama Old Trafford nungi küm 12 asaya aser iba mapang Premier League title pongu aser Champions League aser FA Cup koka liasü.

Palmer aser Foden England W-Cup squad nung mali

Monupii/May 22, 2026 (Agencies): Thomas Tuchel-i Cole Palmer aser Phil Foden na England indang World Cup squad nung mezüngok.

Hokolbarnü sangdongba squad nung Real Madrid nungi asayar Trent Alexander-Arnold-a züngoksema mali, saka mimlai lia Al-Ahli striker Ivan Toney squad nung züngoksemogo.

Küm 60 tashi England team-i international asayamung ka dang mekoki aruba tembangdaksütsü nükjidong nung Tuchel ya shima liasü.

Taoba Paris Saint-Germain aser Bayern Munich coach yagi kanga tasü ita telemteba kari agiogo, aser England team-i taruba asayamung nung takok tajung mongutetra pa kanga mejungi aitsütsü ana nung lir.

2024 küm England team Euro nung final tonga asayaba mapang Foden aser Palmer nati tongtibang shilem agiogo,

Ajisüaka Manchester City nungi asayar Foden aser Chelsea playmaker Palmer nati tena indang club nungi tang asaya aliba season nung junga masayatetba sülen züngtokogo.

Tang asaya aliba Premier League season nung England nunger asayatem rongnungi goal timtiba idaktsüba asayatem süaka Nottingham Forest midfielder Morgan Gibbs-White aser Leeds striker Dominic Calvert-Lewin nata squad nung mali.

Brentford midfielder aser taoba mapang Liverpool captain Jordan Henderson, Crystal Palace nungi asayar

Adam Wharton melena shimogo.

Tuchel-i ashiba agi, asayatem dang parnok United States nung oa masayatsü ta ashitsü ya temela masü asü.

Manchester United defender Harry Maguire-i Brehostibarnü ashiba agi, pa team nung mezüngokba atema aoksa liasü.

"Ni season tepeyong kanga junga asayaba sülen taküm ni linük asoshi tongtibang shilem agitettsü ta bilema liasü. Iba telemteba agiba agi ni kanga aoksadaktsü," ta arishi küm 33 tain asayar yagi ashi.

Kasa mapang nung Maguire indang Manchester United teammate Luke Shaw-a squad nung mali.

England team taküm World Cup nung mezüngbuba asaya Croatia den Dallas nung June 17 nü asayatsü aser iba sülen Ghana den June 23 aser Panama den anogo pezü lir asayatsü.

2026 World Cup atema England Squad:

Goalkeepers: Jordan Pickford, Dean Henderson, James Trafford.

Defenders: Reece James, Tino Livramento, Dan Burn, Marc Guehi, John Stones, Nico O'Reilly, Ezri Konsa, Jarell Quansah, Djed Spence.

Midfielders: Declan Rice, Elliot Anderson, Jude Bellingham, Jordan Henderson, Kobbie Mainoo, Morgan Rogers, Eberechi Eze.

Forwards: Harry Kane, Ivan Toney, Ollie Watkins, Bukayo Saka, Noni Madueke, Marcus Rashford, Anthony Gordon.

Season tembangba sülen Guardiola-i Man City toktsütsü

Monupii/May 22, 2026 (Agencies): Season nung tatembangbuba asaya Deobarnü asayaba sülen manager Pep Guardiola-i club toktsütsü ta Manchester City-i sangdong ka ajanga metetdaksüogo.

Guardiola lenisüba nung season 10 asayaba mapang City-i tongtibang takok marok 17 benogo, kong Premier League title trok aser Champions League ka densema lir.

Arishi küm 55 tain coach atema tatembangbuba asayaji Etihad Stadium nung Aston Villa den asütsü.

Guardiola nem tetushi agüja City indang tawa yangluba north stand ya pa tenüng nung jatsütsü, aser pa asoshi tatembangbuba asaya nung lapoktsütsü.

BBC Sport-i Hombarnü sangdong ka ajanga, pa indang contract tembangsü küm ka lia City pur Guardiola den pilatsü atema renema liasü.

"Kü dang club toktsüba kuli tasüngdang. Kuli kecha mali, saka ni club toktsütsü mapang ta bilemer," ta Guardiola-i ashi.

"Taküm nung kecha teti asoshi masü, ajita asübo ni club metoktsüla. Nüburtem, tajangshibatem aser ni Manchester City meimba yabo teti asoshi asütsü," ta pai ashi.

Taoba Chelsea manager

Enzo Maresca, shiba Guardiola kübok City nung inyakoyo, pai arishi küm 55 tain coach ya melentsü imlar.

2025-26 Premier League nung Arsenal pur mekoktetba sülen anogo asem lir Guardiola-i club toktsütsüba sangdongogo

Mongolbarnü City pur Bournemouth den draw asüba sülen Arsenal-i Premier League ya koka liasü.

Tatembangbuba season nung City pur FA Cup aser League Cup final tonga aniba sülen Guardiola-i club toktsütsü.

2016-17 season tenzükba mapang Guardiola-i Manuel Pellegrini ket nungi City coach mapa agizüka liasü.

Pa lenisüba nung club-i takok marok ka danga mekoktetba tatembangbuba season tembangaka, pai aniba club yagi English football amokbanger asaya aruogo.

2017-18 season nung pa lenisüba nung City kijai top-flight season ka nung point 100 tongtetogo aser kasa season parnoki otsü tasen ka yanglua Premier League season ka nung goal 106 idaktsü.

2022-23 küm City ya Manchester United sülen season ka nung Premier League, FA Cup aser Champions League akokba tanabuba team aküm.

Guardiola-i aniba City team

ya season pezü atonga English league title abenba mezüngbuba team aküm.

Ajak senteper pai Premier League trok, Champions League ka, FA Cup asem, League Cup pongu aser Fifa Club World Cup ka kokogo.

Ashmita Chaliha Malaysia Masters quarters nung tsükogo

Monupii/May 22, 2026 (Agencies): Malaysia Masters Super 500 badminton tournament nung Hokolbarnü India tsür Ashmita Chaliha quarterfinals nung Denmark tsür Line Hojmark Kjaersfeldt mekoki tsükogo.

Tetsüng tachichilen temekok yiruba ajanga ita ti tashi masayateti lir meyipa arur asayaba mapang Ashmita-i Hokolbarnü quarter final asaya nung mezüngbuba game bo kanga meranga asayar 23-21 agi akok, saka tanungba game ana ya 18-21, 11-21 agi mekoki tsükogo.

Ashmita Chaliha-i asaya kanga junga tenzük aser mezüngbuba game nung break tashi nung la 11-6 agi tejakdang liasü.

Ajisüaka break sülen Line-i asendenshir kanga junga asyaa-a point 13-12 aküm aser iba sülen 19-18 kuma liasü. Ajisüaka India tsür la yagi tera agi tajungba asayateta mezüngbuba game akok.

Tanabuba game nunga Chaliha 10-5 agi timba liasü, saka Denmark tsür la yagi kanga junga asaya-a 13-13 aküm aser iba sülen asaya koka decider asayatsüsa aküm.

Ajisüaka tasembuba game nungbo Line-i tetenzük nungi kanga junga asaya aser la yakta dang 8-4 agi tejakdang aküm aser Chaliha nem maangka kecha magütsüi asaya ya ayong ayonga koka semifinal-i iogo.

India nunger asayatem ajak tsükatokba sülen Ashmita Chaliha-i pre-quarter final asaya nungbo Malaysia tsür Goh Jin Wei 21-13, 21-16 agi ayong ayonga koka quarter-i ia liasü.

Kasa mapang nung Kjaersfeldt-ia India tsür Malvika Bansod 21-16, 8-21,

15-21 agi koka quarter-i ia liasü.

Tetsür kija asaya tanga ka nung Thailand Masters champion Devika Sihag-a top seed China tsür Chen Yufei-i 21-16, 21-13 agi koka liasü.

Tarep temeyoktep asaya nung India nunger tarep Sathwik Kanapuram aser Radhika Sharma nata America nunger tarep Presley Smith aser Jennie Gai nati 12-21, 25-27 agi tsükdaktsüogo.

Tabur tarep asaya nung India nunger Hariharan Amsakarunan aser MR Arjun na China nunger Hu Ke Yuan aser Lin Xiang Yi nati 14-21, 15-21 agi koka liasü.

India nunger rongnungi iba asayamung nung Ashmita Chaliha kija anunger liasü, saka la-a tsükogo.

BILEMDANGANG

"Mapa ka nung tajungba akümstsü atema tanen makai inyaktsü nungdaker."